

Mocoako erreakzioak



Eli Pagola *
BERTSOLARIA

(A klasekidea)

Facebook-a zabaltzean
azaldu den lehena.
Zeinen desberdina den
oraina ta lehena...
Nahiz berez den aspaldi
pasa zitekeena
horrenbeste hildako,
ze samin, ze pena.
Latz da Errusian (*)
pasa berri dena.

(*) Errusian atentatua izan zen.

(B klasekidea)

Gure anai gaztea
ez da inon ageri,
desagertuta doa
hiru egun t'ardi,
ez dakienez ezin
joan da igeri...
gajoak izan arren
zailtasun gehiegi
senak bizirik dela
esaten dit neri.

(Juan Manuel delako bat)

Ene, hegoaldean
ze tragedia, ai!
Gobernuak kontua
hurbiletik darrai,
ate denak zabalik
ditugu zuen zai,
egingo dugu gure
eskutan den zernahi,
(orain arte ez baina
gaurtik aurrera bai?)

(Bertako bat)

Gertatu berri dena
ezin dut sinetsi...
hoge urtez guardia
ez dut inoiz jetsi.
Dozena bat oilasko,
etxe eta hesi,
dena ibaian behera
joan zait ihesi.
Halako desgrazirik
ez nuen merezi.

(Orojakile bat)

Herria egonik bi
ibairen erdian
gutxi ez eta beste
baten atarian.
Betidanik egin du
euri gehiegi han
ta joera mantendu
da azken aldian...
zerbait aurreikusi
ziteken agian.

(Aktibista bat)

Mocoako erronka
ez denez makala
Gobernua aktiba
bedi berehala
erreskate taldeak
sortuz nola hala
militar, gerrilero
zein zibil bezala
aukera duen orok
lagundu dezala.

Laurehun desagertuen
bilatze jardunak,
hil diren berrehun eta
berrogei lagunak...
kontatzera bultza nau
gai-gordintasunak
sei testigantza egun
hauetan entzunak.
Lasai eska ditzala
gehio nahi ditunak.

Doinua: Itziarren semea

* Eli Pagola Energia Berriztagarrien ingeniariartzako
4. mailako ikaslea da. Kolonbiako Caquetá erregioan
ikasten ari da. Martxoaren 31 eta apirilaren 1aren
arteko gauean euriteek lokatzez estali zuten Moco
herria.